



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

POČETAK KRAJA...? >>>

Danas, 29. Juna 2017. godine, kompanija u vlasništvu Jusufa Arifagića (Fana Arifagić), je počela sa vraćanjem krava iz Krnjeuše, u Kozarac, kod Prijedora.

Podsjećamo kako je prva količina crvenog norveškog govečeta, ovdje dovezena pred kraj prošle godine, a plan je bio da se svake godine ovaj broj povećava, tako da bi ih za pet godina, ukupno bilo između 4 i 5 hiljada, na farmi u Bos. Petrovcu.

Nakon današnjeg odlaska 40 grla, ostalo ih je 210, koje takodje namjerava izmjestiti odavde, kako kaže, do kraja ove godine, najkasnije.

Ono što je bilo planirano, jeste širenje ove farme, s hiljadama muznih krava, zatim odgajalište elitnih norveških bikova, postavka i aktiviranje rada tvornice stočne hrane, s opremom koja se već nalazi u Krnjeuši, što sve naravno znači nova značajna zapošljavanja, investicije i ubrzani progres i privrednu ekspanziju, ne samo Bos. Petrovca, nego cijeloga regiona i šire.

Osnovni motiv dolaska i ključna pretpostavka, njegovoj odluci za dolazak u ove krajeve, bila su pusta polja i prostranstva, ove opštine, koja će izgleda takva ostati i dalje, zbog nevjerojatnih obstrukcija koje su krenule od novoosnovane većine u ovdašnjem općinom vijeću, prije svega.

Išlo je to sve do federalnog nivoa, preko kantonalnog i federalnog ministarstva, do premijera Novalića i predstavničkog doma, Doma naroda, visokog predstavnika, Incka, svih medija.....

Medjutim, bez obzira što su se, o tome, ova dva ministarstva i vlada kantona, konačno i u suštini, pozitivno pismeno očitivali, u smislu jasne osude svake zloupotrebe neobradjenog državnog zemljišta (što, s ugovorom opštine o davanju u 5-godišnji posjed zemljišta u Prkosima i Oraškom brdu, Arifagiću, nije slučaj), on definitivno ne želi više biti dio ove bosansko petrovačke drame, s epilogom koji će osjetiti generacije koje dolaze.

Teško da se može, u cijelom civilizovanom svijetu, pronaći ovakav primjer, nažalost.

Podsjetimo se kako su prvi put ovdje počeli dolaziti ambasadori visoko razvijenih evropskih država (Švedska, Njemačka, Norveška), vrhunski stručnjaci iz Norveške, iz oblasti stočarstva s prezentiranim dugoročnim planovima ulaganja sopstvenog kapitala, u ovu opštinu i region.

Sitnosopstveni, lični i stranački interesi, totalna nepismenost i apsolutno odsustvo elementarnog znanja i vizije, plasirani kroz razne političke strukture ove opštine, kantona i zemlje, su potjerali krave u kamione da se vrate tamo odakle su došle.

Gotovo isti scenarij, kada govorimo o petrovačkim šumama kao resursu, je godinama ovdje prisutan, u još gorem obliku.

Godinama traje pljačka ovog resursa, svakodnevno, dok su naša prostranstva i pusta polja, „odradjena“, zaista brzo.

Niti jedna krava, s te farme nije izašla, za sve ovo vrijeme zbog sveopšte urote protiv ovog investitora.

Da li mi, zapravo, uopšte shvatamo kako je to danas Arifagić, samo slučajno. Koliko takvih tjeramo zauvijek ?

Ljudi nam, već poodavno odlaze IZ ove zemlje, a sada evo i krave SA te iste zemlje, koja je njima ipak malo potrebnija nego ljudima, moramo to priznati.

Nema potrebe predviđati sudbinu i budućnost onih koji ostanu tamo gdje im neko dodje, s najboljim namjerama i pri tome im, sa sobom donese - a da ništa od njih ne dobije, pa na kraju bude istjeran.

U Bos. Petrovcu, 29. juni 2017.



Odlazak Arifagićevog kamiona...

Konačno podrška i od Vlade USK

Dana 1.6.2017. godine održana je 80. redovna sjednica Vlade Unsko-sanskog kantona, na kojoj je donesen Zaključak o obustavljanju koncesionog postupka privrednom društvu „Fahd“ iz Bihaća za dodjelu poljoprivrednog zemljišta u Općini Bosanski Petrovac, na lokacijama Oraško brdo i Prkosi.

Tom prilikom je premijer Unsko-sanskog kantona, Husein Rošić, izjavio: „Kao Vlada želimo pomoći u rješavanju pitanja općenito koji se desio u Općini

Bosanski Petrovac, kada je u pitanju investitor Arifagić. Ovdje se radi o jednom javnom pozivu i odluci koja traje nekoliko godina. Ne znam zašto to do sada Vlade nisu rješavale. Vjerovatno je zbog te činjenice, kompletan taj predmet doveden u ovakvu jednu situaciju, da je skoro pa investitor i odustao od svoje investicije u Bosanskom Petrovcu. Vjerujem da smo sa današnjim zaključkom i to pitanje riješili dugoročno i da ćemo svakako pomoći i Općini Bosanski Petrovac da se riješi to na obostrano zadovoljstvo stranaka u poslu.“

Nacionalni praznik Švedske

Povodom 6. juna, Nacionalnog praznika Švedske, svečanom obilježavanju prisustvovao je i načelnik Zlatko Hujčić.

Podrška evropskom putu BiH i borbi za ravnopravnost spolova prioriteta su djelovanja Ambasade Švedske u BiH u narednom periodu, poručio je tokom prijema povodom Nacionalnog dana Švedske, ambasador ove zemlje u BiH, Anders Hagelberg.

“Ministri vanjskih poslova Švedske i BiH su tokom ove godine imali već dva susreta. Jedan je bio u Stockholmu, a drugi u Sarajevu. S ponosom možemo reći da danas u Švedskoj živi 100.000 ljudi porijeklom iz BiH”, kaže Hagelberg.

Podsjećamo da je ambasador Hagelberg sa Marie Bergstör, predstavnicom švedske agencije za razvoj zemalja jugoistočne Evrope, boravio u našoj Opštini u martu ove godine, kada je dogovorena finansijska podrška u iznosu od 800.000 eura, za izgradnju postrojenja za prečišćivanje otpadnih voda u našem gradu, te o mogućim investicijama u sferi poljoprivrede.



Anders Hagelberg, ambasador Švedske

Protokol o saradnji

Potpisivanjem protokola o saradnji, 21. 06. 2017. godine, nastavljena je dobra koordinacija između Opštine Bosanski Petrovac i UNDP-a BiH.

Sve lokalne zajednice i svi nivoi vlasti u BiH po agendi za pristup u članstvo EU trebaju do 2021. godine imati usvojene i razrađene nove razvojne strategije ili revidirane stare.

Radi se o nastavku treće faze projekta koja ima za cilj proširenje i konsolidiranje znanja i sistema za upravljanje razvojem na lokalnom, kantonalnom i entitetskom nivou.

Sastanak sa načelnikom Južnobačkog upravnog okruga

Dana 8.6.2017. godine načelnik Zlatko Hujčić je po službenom pozivu, prisustvovao sastanku u Novom Sadu, gdje je razgovarao sa Milanom Novakovićem, načelnikom Južnobačkog upravnog okruga.

Tema sastanka je bila moguća saradnja koja će se razviti kroz kulturnu i ekonomsku sferu.

Prvi korak saradnje će se očitovati kroz registraciju Petrovčana u Bačkoj, s obzirom na aktuelnu implementaciju projekta u našoj Opštini, „Otvaranje kancelarije za saradnju sa dijasporom“, čiji je cilj, također, uspostavljanje saradnje sa našim ljudima, koji žive i djeluju u drugim državama.

Konkretno, saradnja naše Opštine i Južnobačkog upravnog okruga je počela još prošle godine u aprilu, potom je potvrđena u februaru ove godine, kada je načelnik Milan Novaković sa svojim saradnicima bio u posjeti Opštini Bosanski Petrovac.

Tokom boravka u Novom Sadu, obavljen je razgovor i sa predsjednikom Udruženja Petrovčana gospodinom Milenkom Zorićem, a vezano za ljetne aktivnosti i kulturne sadržaje, koji slijede u ljetnim mjesecima.



Načelnik Hujčić sa načelnikom Južnobačkog upravnog okruga

Razvojna strategija naše Opštine

Dana, 30.6.2017. godine, u Vijećnici naše Opštine, održan je sastanak partnerske grupe koja predstavlja jednu od aktivnosti u postupku Revidiranja strategije.

Partnerska grupa je sastavljena od članova Opštinskog razvojnog tima, na čelu sa Načelnikom, članova Komisije za razvoj, predstavnika javnog i privatnog sektora, udruženja, vjerskih organizacija, i mjesnih zajednica.

Šef Službe, Nevsad Ramić, je prezentirao strategiju, nakon čega su učesnici aktivno diskutovali, i davali prijedloge.

Sljedeći korak je usvajanje Revidirane strategije od strane Opštinskog vijeća Bosanskog Petrovca.

Strategija razvoja opštine Bosanski Petrovac 2011-2020 godine predstavlja ključni strateško-planski dokument opštine, koji treba da podstiče rast i razvoj zajednice. Strategija razvoja obuhvata društvenu, ekonomsku, okolišnu, kao i prostornu sferu.



Partnerska grupa na sastanku...

Bajram-namazi, u Bosanskom Petrovcu

Dana 24.6.2017. godine je, povodom posljednjeg dana ramazana, u hotelu Silver u našem gradu, načelnik Opštine Zlatko Hujčić upriličio zajednički iftar.

Iftaru su, pored velikog broja vjernika i Petrovčana, prisustvovali efendija Mirzet Spahić i imami svih džemata, čime se i ove godine pokazao primjeran suživot u našem gradu.

A dana, 25.6.2017. godine je, u prisustvu velikog broja vjernika klanjanjem bajram-namaza u Gradskoj džamiji, počelo obilježavanje Ramazanskog bajrama u Bosanskom Petrovcu.

Bajramsku hutbu i poruku uputio je Mirzet ef. Spahić. Efendija je svim vjernicima islamske vjeroispovijesti čestitao Bajram, sa željom da blagdan provedu sa porodicom, rodbinom i prijateljima.

Ramazanski bajram je jedan od dva najznačajnija islamska praznika, i obilježava kraj posta. Jedna od pet osnovnih dužnosti svakog muslimana je upravo post koji se provodi u ovom mjesecu. Tokom trideset dana ramazana vjernici moraju da se uzdržavaju od hrane i pića, i to od zore pa do zalaska sunca.

Bajram-namaz koji prethodi Bajramu počinje 45 minuta nakon izlaska sunca. Ramazanski bajram uvijek pada 1. ševala (10. mjesec muslimanskog kalendara) i traje tri dana.

Tradicionalni pozdrav povodom Ramazanskog bajrama je Bajram šerif mubarek olsun.

Pored klanjanja bajram-namaza u Gradskoj džamiji, molitva se obavila i u ostalim džamijama džemata u Bosanskom Petrovcu.



Bajram-namaz u Gradskoj džamiji



Čestitke i doček Bajrama...

Polaganjem cvijeća obilježen Dan šehida u našoj Opštini

Cvijeće su, ispred Opštine, polagali načelnik, Zlatko Hujić, i njegovi saradnici Bajazid Hadžalić i Huse Jukić.

Odlukom Rijaseta Islamske zajednice u BiH drugi dan Ramazanskog bajrama proglašen je Danom šehida, kao dan sjećanja na sve one koji su dali živote braneći porodicu, čast i domovinu.

Ovaj dan se obilježava obilaskom šehidskih mezarja, posjetama šehidskim porodicama, učenjem hatme (molitve) za sve šehide i podsjećanjem na njihovu žrtvu.

Polaganjem cvijeća na Trgu šehida i kod spomenika civilnim žrtvama, kod Biblioteke, obilježen je Dan šehida u Bosanskom Petrovcu.



Polaganje cvijeća povodom Dana šehida

Turistički centar „Klekovača“

Ovom prilikom je načelnik Hujić sugerisao kako je nedovoljna uključenost svih ostalih okolnih mjesta, odnosno gradova Federacije BiH, (Bosanski Petrovac) i Republike Srpske (Drvar), u smislu primjene ekonomskih kriterija za tako važan i kompleksan projekat.

Dana 27. 6. 2017. godine, u sali za sastanke Ministarstva za prostorno uređenje, građevinarstvo i ekologiju Republike Srpske održana je Javna rasprava i sjednica Savjeta za praćenje izrade prostornog plana „Klekovača“, u Banjoj Luci.

Razmatran je stav nosioca izrade Plana, prema primjedbama i prijedlozima na sam Nacrt, koji je prethodno bio na javnom uvidu u trajanju od mjesec dana.

Nakon održane Javne rasprave, nosilac pripreme Plana je utvrdio prijedlog dokumenta uzimajući u obzir sve prijedloge i sugestije.

Raspravi su, pored mnogobrojnih predstavnika Ministarstva za prostorno uređenje, građevinarstvo i ekologiju, prisustvovali i predstavnici naše Opštine, načelnik Zlatko Hujić, Šef Službe, Nevsad Ramić, direktor JP „Komunalno“, Savo Jovanić, kao i načelnik Drinića, Milan Grbić.



Klekovača, 1963. m nadmorske visine

„Zavičajni zbor-kosidba“

Dana, 17.6.2017. godine u Novom Sadu, u fruškogorskom naselju Bukovac, održan je 17. „Zavičajni zbor-kosidba“, manifestacija očuvanja običaja i njegovanja vrijednosti krajišnika, kojoj je prisustvovalo oko 2.000 ljudi.

Održana su takmičenja u sportskim igrama, poput bacanja kamena sa ramena, skoka u dalj, navlačenja konopca, navlačenje štapa, varizanja i klisanja, ali i kosidbe koja je upravo i najznačajnija za nas.

Pored velikog broja učesnika, iz raznih zemalja, najbolji je bio Mirko Kecman iz Bosanskog Petrovca. Naš dragi sugrađanin i ovaj put je pokazao svojim umom, snagom i spretnošću da je naš grad kolijevka nadarenih ljudi, u svakom pogledu.

„Moj moto je očuvanje već zaboravljenih narodnih običaja, od kojih je nekada svaka kuća živjela. Dakle, nastojim očuvati i održati tradiciju naših djedova i očeva koji su dokazali da ljudskim trudom i poštenim radom čovjek savladava i pobjeđuje brojne prepreke koje mu stoje na putu!“- rekao je Mirko Kecman.

Organizatori ove manifestacije su zavičajno udruženje „Manjača“ i Savez krajiških udruženja.

Pored mnogobrojnih gostiju, kao i svake godine, Kosidbi je prisustvovao i načelnik Zlatko Hujčić, te sekretar Općine Esmir Brković.



Na manifestaciji „Zavičajni zbor-kosidba“

Uzgoj soje na području naše Opštine

Poljoprivredni zavod u saradnji sa German Cooperation-GIZ je i ove godine na području naše opštine zasijao ogledne parcele soje na površini od 1,3 hektara, na imanju dva poljoprivredna proizvođača, Fazlić Džemila iz Rašinovca i Karanović Gorana iz Krnjeuše.

Na ovim imanjima zasijane su 4 sorte, za razliku od prošle godine, kada su sa jednom sortom na površini od 0,8 hektara kod 4 poljoprivredna proizvođača postignuti solidni rezultati.

Protekle sedmice, predsjednik GIZ-a i predstavnik Općinske službe su obišli ogledne parcele soje, nakon čega su dali pozitivne komentare, s tim da su vremenske nepogode (led) usporile rast.



Na terenu, obilazak soje...

Proizvodnja lana se nastavlja

Šest poljoprivrednih proizvođača u našoj opštini, opštinskoj službi za poljoprivredu prijavili su sjetvu lana, koji je zasijan na imanju Latinović Miodraga u Vrtoču, Kerkez Vojina u Suvaji, Spahić Elmedina u Rašinovcu, Samardžije Nikice u Bukovači, Milene Salapure u Bjelaju, i Radišić Jove u Krnjeuši.

Ukupna površina koja je pod lanom je oko 8 hektara.

Sjeme lana je jedno od najvažnijih izvora sušivih ulja. Postoje podaci, da se lan u tu svrhu uzgajao još prije 6.000 godina. Sadržaj ulja u sjemenu je od 32 % do 43%.

Laneno ulje se uglavnom koristi za proizvodnju boja, lakova, mekih sapuna i tiskarskih boja.

Bilje koje je dugo godina bilo zaboravljeno na ovim područjima, u Bosanskom Petrovcu ogleđno se počelo sijati 2010. godine, a 2011. godine zasijane su prve parcele, na površini od jednog hektara.

Inače, prinosi lana su se u Bosanskom Petrovcu pokazali izuzetno dobrim.



Cvijeće Klekovače



Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski Petrovac od 15:00-17:00, svakim danom na 90.9 MHz fm